

COMUNANZA E ISTRUZION

## Chi sarèl a rejer la Scola Ladina de Fascia?

*A n meis dal scomenz de n nef an de scola, amò più senester per la precauzions sanitàeres, no l'è stat amò ofizialisà la nomina, ma somea che sie stat cernù l vicarie Claudio Valentini*



*I frabicac de la Sorastanza e del Liceo de Fascia.*

En vender passà la Jonta de la Provincia Autonoma de Trent à nominà i dirigenc che col prum de setember rejarà i desvalives istituc de scola del Trentin e che arà l'encèria no sorida de endrezèr dut per tachèr via n an de scola più senester e delicat che zenza per l'obligh de arseguèr tel medemo temp l derit a l'ensegnament di bec e la segurezza sanitàera.

Te la delibera, per chel che vèrda la Scola Ladina de Fascia, vegn confermà che la Sorastanta Mirella

Florian jirà en penscion, ma no vegn nominà nesciugn a so post. Chesta nomina – l'è scrit – vegnarà fata più inant ajache dant ge vel aer la cordanza con l Comun general de Fascia per veduda da la normes.

Te n meis donca zachei cognarà tor sù l'encèria de vidèr la Scola Ladina de Fascia, la più gran «azienda» de val, con 1400 scolees e studenc e 200 dependenc, ma amò no l'è stat ofizialisà chi che sarà chiamà a chest ruol delicat e

strategich per duta la val. Troèr na persona che à duc i requisic no l'è sori e per chest amò acà n meis l Consei de la Scola Ladina de Fascia con sie president Stefano Weiss ge aea manà na letra a la Procuradora del Comun general, al Conseier ladin Luca Guglielmi e al Dirigent general del Departiment Istruzion PAT Roberto Ceccato, domanan che vegne tout dant la costion per ge arseguèr a la Scola n dirigent con i requisic, competent e aldò. Te

la letra vegnia palesà la speranza che a la Sorastanta Florian posse ge vegnir amò sperlongià l'encèria, e se no che vegne nominà l soul dirigent scrit ite a l'albo provinzièl che à l patentin de ladin, o n auter dirigent con duc i requisic domané. Ence l'Union di Ladins se aea out a la istituzions palesan sie cruzie e domanan atenzion per chesta nomina emportanta per na scola de na comunanza ladina.

La lege provinzièla nr 5 del 2006 sul sistem educatif e de istruzion de la PAT perveit per la nomina del Sorastant de la Scola de Fascia trei modalitèdes. L pel vegnir cernù anter i dirigenc che fèsc pèrt de la graduatoria provinzièla che à l'atestat de cognoscenza del ladin, ma ades l soul dirigent con l patentin, l professor Nicola Parzian, l'è jà stat assegnà a n'otra scola de Trent, donca chesta opzion no é più possibola. En alternativa pel vegnir dat na encèria de 5 egn da poder renovèr a chi che veng n concors rerservà, descheche l'era sozedù del 2008, canche chest concors era stat vent da la professora Mirella Florian, che dapò per duta l'aisciuda l'aea tout pèrt al percors formatif per i dirigenc scolastics. Ma ence per chesta modalità oramai i é massa

tardives. Resta l met de ge fèr n contrat a zachei che à i titoi academics per vedui e l'esperienza te la scola de amancol 7 egn. La Sorastanta Mirella Florian fenirà sia encèria a la fin de aost, ma ajache la cognessa se tor fora amò duc i dis de ferias che ge pervegn e che no vegn paé fora, la podessa jà aer fenì. L'è dezidù de jir en penscion con «quota cento» ajache l'encèria de Sorastanta no ge é più stata confermèda, magari l'aea ence azetà de rejer amò la Scola de Fascia fin canche no fossa stat troà la persona con duc i requisic academics per tor sù sie testamonech o no fossa stat metù a jir n concors. Endèna, apontin tel moment che nosc sfoi era dò a jir en stampa, zeche somea se aer moet e l'è vegnù fora la ousc che, aldò de la priorità palesèda dal Comun general de Fascia che vegne nominà na persona che à na bona cognoscenza de la realtà ladina, per l'encèria de Sorastant cognessa vegnir nominà l vicarie Claudio Valentini. Speton la comunicazion ofiziala ajache i tempes é strenc e l'encèria senestra e delicata, speran che l nef an te la Scola Ladina de Fascia posse tachèr via al miec.

*Lucia Gross*